



Wie die kunige mit ir rechen
 schlafen giengen.

XXX. Auenture.

Der tac der het nu ende. vnt naht in diu naht.
 den wege moden degenen. ir sorgens an vaht.
 die herren solden rowen. vnt an ir bette gan.
 das bereite Hagene. ez wart in schiere chvnt getan.

Gonther sprach zem wirt. got laze ouch mit freuden lebn.
wir wellen varn slafen. ir solt vns vrloop gebn.
als ir vns gebietet. wir chomen morgen fruo.
er schiet von sinen gesten. vil harte minneklichen do.

Dringen allenthalben. die geste man do sach.
Volker der chvne. zu den Hunen sprach.
wie geturret ir den rechen. uf die fozze gan.
vnt welt irs niht ouch mazen. so wirt ir leide getan.

So slah ich eteslichem. so swären gigen slac.
hat er getriwen iemen. daz erz beweinen mac.
wan wicket ir vns rechen. ia dunchet ez mich gvot.
ez heizent alle degene. vnt sint geliche niht gemvot.

Do der videläre. so zornechliche sprach.
Hagen der chvne. vber ahfel sach.
er saget ir rätet rehte. der chvne spileman.
ir Chriemhilde degene. ir solt zen herbergen gan.

Des ir da habet willen. ich wän ez iemen tuo.
welt ir sin beginnen. so chomt vns morgen fruo.
vnt lat vns wege mvden. hint haben gemach.
ia wän ez von heleden. mit solchem willen ie geschach.

Do brahte man die geste. in einen witen sal.
dar inne si sit namen. den totlichen val.
da fonden si gerihtet. vil manigiv bette breit.
in riet die kuneginne. die aller grözisten leit.

Vil manigen kolter spähe. von Arraz man da sach.
von vil lichten pfellen. vnt manige bette dach.
von Arabischen siden. so si beste chvnden sin.
ouch lage in uf den enden. von golde herlicher schin.

Div dechelachen härmin. vil menigiv man da sach.
vnt ovch von swarcem zobe. dar vnder si ir gemach.
des nahtes solden schaffen. vnz an den lichten tac.
ein kunec mit sinen frivnden. nie so herlich gelach.

O we der nahtfelde. sprach Gifelher das kint.
vnt owe miner frivnde. die mit mir chomen sint.
swie et ez min swester. mir goetlich erbot.
ih fverhte das wir muosen. von ir schulden ligen tot.

Nu lazet iwer sorgen. sprach Hagen der degen.
ich wil der schilt wache. noch hinte selbe pflegen.
ich behvete ich wol mit triwen. vnz vns chvmt der tac.
daz wizzet snelle degene. so genesse swer der mac.

Do nigen si im alle. vnt sagten im des danc.
si giengen zu den betten. div wile was niht lanc.
daz sich engestet heten. die ellenden man.
Hagene der starche. sich do wasen began.

Do sprach der videläre. Volker der degen.
verfmahtes iv niht Hagene. so wolde ich mit iv pflegen.
der schilt wache hinte. vnze morgen frvo.
der helt vil minnekliche. danchte Volkere dvo.

Nu lone iv got von himele. vil edel Volker.
zallen minen sorgen. sone gert ich niemens mer.
niwan ich aleine. swa ich hete not.
ich sol ez wol verdienen. mich enwendes der tot.

Do garten si sich beide. in lichte ir gewant.
do nam ir ietwedere. den schilt an sine hant.
vnt giengen v; dem huse. fur die tor do stan.
do horten si der degene. daz was mit triwen getan.

Volker der vil snelle. zu des sales want.
sinen schilt den guten. leinte von der hant.
do gie er hin widere. die videln er genam.
do dinter sinen friunden. als ez dem degene gezam.

Vnder die tor des hofes. saz er vf den stein.
chvner videläre. div sonne nie beschein.
do im der seiten dönen. so swozlich erchlanch.
die stolzen ellenden. sagten im des grozen danc.

Do chlongen sine seiten. daz al daz hvos erdoz.
sin ellen zu der fvooge. div beide warn groz.
senfter vnt swezer. videln er began.
do enswebter an dem bette. vil manigen sorgenden man.

Do si wol entslaffen waren. vnde er daz ervant.
do nam der degene widere. den schilt an sine hant.
do gie er v3 dem hofse. for die tore stan.
vnt hvote siner friunde. vor den Chriemhilde man.

Nach dem ersten slafe. ich wän ez e' geschach.
Volker der vil chvne. einen helm schinen sach.
verre v3 einer vinsten. die Chriemhilde man.
wolden an den gesten. schaden gerne han getan.

E' Chriemhilt dise rechen. hete dan gesant.
si sprach ob irf also vindet. durch got so sit gemant.
daz ir da slahet niemen. wan den einen man.
den ungetriwen Hagenen. die andern solt ir lebn lan.

Do sprach der videläre. nu seht her Hagene.
iane zint mir diz märe. niht ze dagene.
ia sih ich mit gewäfen. dort her lute gan.
als ich mich versinne. ich wän si wellent vns bestan.

Nu swiget sprach do Hagene. lats vns her naher baz.
e' si vns werden innen. so wirt hie helme vaz.
mit swerten verrocket. von der minen hant.
si werdent hint ir frowen. hin wider obele gesant.

Ein der Hünen rechen. vil schiere daz gesach.
daz diu tiure was behuetet. wie balde er do sprach.
des wir da heten willen. iane mag es niht ergan.
ich sihe den videläre. an der schilt wache stan.

Der treit vf sine hovbte. einen helm glanz.
lwotter vnt herte. veste vnt ganz.
ovch lohent sine ringe. sam daz fiure twot.
bi im stet ovch Hagene. des sint die geste wol behvot.

Behant si widercherten. do Volker daz ersach.
zv sine hergesellen. er zorneklichen sprach.
lat mich zv den rechen. von dem hvoose gan.
ich wil vragen der märe. der frovn Chriemhilde man.

Nein durch mine liebe. sprach Hagene der degen.
welt ir deheines strites. mit den helden pflegen.
so bestent si ouch mit swerten. vnt bringent ouch in not.
so mvese ich ouch helfen. werz aller miner mage tot.

So wir danne beide. komen inden strit.
zwene oder viere. in einer kurzen zit.
die sprongen zv dem hvoose. vnt täten vns diu leit.
an den slafenden. diu nimmer werden verkleit.

Do sprach aber Volker. so lat doch daz geschehn.
daz wir si innen bringen. daz ich si habe gesehn.
daz des niht haben loygen. die Chriemhilde man.
daz si vil mortliche. gerne heten getan.

Do sprach der videläre. den Hunen vaste nach.
wie get ir svs gewasent. war ist ir so gach.
welt ir schaden riten. ir Chriemhilde man.
dar solt ir mih zehelpe. vnt minen hergesellen han.

Des antwrte im niemen. zornic was sin mvot.
pfi ir zagen böse. sprach der degen gvot.
wolt ir slafende. vns ermordet han.
das ist so gvoten degenen. her vil selten noch getan.

Do wart der kuniginne. rehte daz geseit.
daz ir boten niht enwrben. von schulden was ir leit.
do svogte si; sit anders. vil grimmech was ir mvot.
des mosen sit engelten. degene chvone vnde gvot.

